

Eskubideen karta

Neure buruari aitortzen dizkiodan eskubideen karta. Burlatan emana, 2016ko otsailaren 29an.

1. Neure buruari aitortzen diodan lehen eskubidea neure buruari nahi adina eskubide aitortzeko ahalmen ezin kenduzkoan datza. Ahalmen edo askatasun hau besteena hasten den tokian amaitu ez, eten baino ez da egiten, aldizkakotasunak ez baitakar mugagabetasunaren ukoa.

2. Neure buruaren defentsan, edota edertasunarenean, gezur esateko eskubidea niretzat hartzen dut, are errima egitekoa ere, beste irtenbiderik ezean.

3. Betiere eskubide ezin ukatuzkoa hartzen dut:

- a) Irratia amatatzeko.
- b) Liburu bat amaitu gabe uzteko.
- c) Zutabegile bat gehiagotan ez irakurtzeko.
- d) Festa bat abandonatzeko.
- e) Olerki bati hastio hartzeko.
- f) Pentsalari bat seriotan ez hartzeko.
- g) Solasa ahalik eta azkarren eteteko.
- h) Neure buruaz beste egiteko.
- i) Zerrenda bat amaitu gabe uzteko.

(Norbaitek / Egileak / Ø)

- a) Ezjakintasunaren apologia egiten duenean.
- b) Aspertzen naizenean.
- c) Hirutan jarraian gai berbera jorratzen duenean.
- d) Buruko mina eragiten badit.
- e) Gauzak oso argi dituenen (eta, zer esanik ez, ni hartaratzeko gogo agerikoa duenean).
- f) Bera partaide duen taldekoka ez balitz bezala diharduenean.
- g) Talde gutxitu, baztertu, zapaldu batekiko nagusitasun jarrera erakusten badu.
- h) Merezi ez duenean.
- i) Aipu segida ia landu gabea botatzen duenean.



Angel Erro

IDAZLEA

@angelerro



Antton Olariaga

- j) Ez badut tutik ere ulertzen.
- k) Atzerriko hizkuntza guztiak ingelesaren maneran ahoskatzen baditu.
- l) *Nutella* nahiago badu.
- m) XIX. mendea baino lehenagoko ezer gutxi interesatzen zaiola esaten badu.
- n) XIX. mendearen ondorengoko ezer gutxi interesatzen zaiola esaten badu.
- o) Gose banago.
- p) Kultura orokorreko ezagutza ertainak xeheki azaltzen badu, munduari berak azalduko balizkio bezala.

(Atal honetan aipatu eskubideek eta baldintzek ez dute hurrenkera berezirik, eta beraz, elkarrekiko edozein lotura edo bat ere ez egin dezake eskubidedun subjektuak)

4. Gaurtik aurrera badut une bakoi-tzean nagoen herrialdeko herritarra izateko eskubidea. Modu berean, neure buruari ematen diot une bakoi-tzean irakurtzen ari naizen liburua- ren egilearen herrialdeko eta garaiko herritarra izateko eskubidea (eleberri historikoak salbuetsita gelditzen dira).

5. Neure buruari aitortzen dizkiodan bestelako eskubideen artean hauek ere badaude:

- a) Emakumeei ateetan edo eskaileretan igotzean lehenago pasatzen uztekoa, mikromatxismoagatik, eta gauza bera gizonezkoei, ez guztiei, lizunkeriagatik.
- b) Gauza guztien gainean iritzi osatua ez izatekoa.
- c) Mundua, halere, aldatzen saiatzekoa.
- d) Topikoak betetzeko.
- e) Nire lagunak etsai eta ez ikusiak ez konpartitzeko.
- f) Ordu oro ergatibo bat huts egitekoa.
- g) Txukuna ez izatekoa.
- h) Txakurrei eta nirekin erdaraz egiten duten guraso euskaldunen seme-alabei euskaraz ez hitz egitekoa.
- i) Originala ez izatekoa. ■